

ҮКІЛІ  
ЫБЫРАЙ



39067  
Тұрккү



ҮКІЛІ  
ЫБЫРАЙ

---



Өлеңдер



“Фолиант” баспасы

Астана

2005

Үкілі Ұбырай Сандыбайұлы. Гекку. Өлеңдер,  
аитыстар және әндер жинағы.

С 20 Құрастырган Көкімбек Салықов.— Астана:  
"Фолиант". 184 бет.

ISBN 9965-477-54-X

Қазақтың ұлы композиторы, өйгілі ақын-әншісі Үкілі Ұбырайдың ән жинақтары бүршиң жарық корсе де, өлеңдері мен аитыстары және толгаулары бас құрасып, жеке кітап түрінде бірінші рет жарық, көріп отыр. Баспада бар еңбектеріне қоса жинақты толықтыруға М. Тырбиевтің, Қ. Жаптілеуовтың, М. Асаиновтың, А. Салықовтың архивтік материалдары, С.А. Құлмағамбет пен М. Сәркенқызының еңбектері пайдаланылды. Кей олеңдердің сөздерін анықтауға кезінде Ұбырайдың өз баласы Есеп ақсақалдың қолқабысы тиіпті. Жинақты құрастырушы қазақтың көрнекті ақыны Көкімбек Салықов озінің ұзақ жылдар сақтап жүрген дүниелерін лайықты түрде пайдаланып отыр.

Жинақта Үкілі Ұбырайдың талай-талай өлеңдері түңгыш рет ел қолына тимек. "Халық жауы" атанип Кеңестік зобалаң кезінде атылып кеткен ақтантегер ақының қолда бар поэзиялық еңбектері ғана беріліп отыр. Осы жолғы жүйеде атақты ақын, дүлдүл композитордың шыгармаларының толық жинағын шыгару болашақтың борышы. Алтын мұра дегеніміз де осы шыгар, толықтыра берейік.

Бұл жинақтың жарық коруіне демеушілік еткен Солтүстік Қазақстан облысының әкімі Тайыр Мансуровқа алғыс айтамыз.

Θ 4702250202-282  
450(05)-04

ББК 84 Қаз 7-5

ISBN 9965-477-54 X

© Салықов К., 2005  
© "Фолиант" баспасы, 2005

## Үкілі Үбірайдың ақындық ерекшеліктері

Қазақтың сал-серілер мектебінің алтын ордасы болған Есіл-Көкше өңірін еске алғанда Серіз сері, Біржан сал, Ақан сері, Үкілі Үбірай ойта оралады, көңіл толқытады, ән әлеміне бөленесін. Дауылғаз ақын, алдына жан салмаған әнші, ұлы композитор Үкілі Үбірай жайлы сөз қозгалғанда оның әлемге тараған әйгілі әні "Гәккү" және қазақтың ұлы әнші қызы Күләш Бәйсейітованы айтпай өте алмаймыз. Бұл ән Е. Брусиловский музыкасын, F. Мұсірепов либреттосын жазған "Қыз Жібек" операсының басты ариясы ретінде кеңінен таралып, 1936 жылғы Мәскеуде өткен Қазақстанның өнері мен мәдениетінің алғашқы онкүндігінде бүкіл әлем таңданған таң шолшандай сұлу саз аспанында жарқ өтті. Үкілі бабамыздың көптеген "Гәккулері" "Сыргақты", "Қараторғай", "Қалдырыған", "Көкше", "Аңшының әні" тағы да басқа әндері бір тәбе болып ақындық өнерінің дәрежесін ерекше көтеріп тұр.

Үкілі Үбірай Сандыбайұлы осы күнгі Солтүстік Қазақстан облысы, Айыртау ауданына қарасты Үкілі Үбірай ауылында 1958 жылы ауылында дүниеге келді. Жазғытаудың бауырын жайлаган Жақсылық қарауылынан шыққан Дерінсал Сәбден тегінен тарайды. Сәбден Абылай ханның әрі досы, әрі даңқты батыры болған әйгілі кісі. Дерінсалдың Сандағай, Маңдай, Әбіле атты үш ұлынынан үлкен әулет тарады. Маңдайдан – Қосшығул, Асайын, Үсейін, Сандағайдан – Бөгіш (Мейіз), Шалғымбай, Үбірай, Әбіледен – Ұлияс, Кенжегали, Молдагали туган. Асайыннан тараған Смагул, Мырзагүл болса, әйгілі ақын, үздік

әнші Мұса Асайынов (1929-1976) Мырзагүл мен менің шешемнің апасы Баги – апамыздан туды, Смағұл қарт ауылымыздың ақсақалы, қарт ұста соғыстан үш ұлы оралмай, тоқсаннан асып қайтыс болды. Шалғымбайдан тараган Сүлейменнің балаларын, Дәуігтің өзін көріп өстім. Жалпы алғанда Деріпсалдың үрпагы қапсағай тұлғалы, ірі денелі келеді. Бауырым Мұса да бойшаң денелі, қыран мұрын, қалың жонды, өткір ұлken көздері ойнақы келетін жігіт еді. Ол ән салғанда ерекше күш бітіп кеткендей, әу дегенде тыңдаған жанды селк еткізетін. Үбірайга тартып туған асыл түяқ, деп ел еркелетті, өзі де еркелетуге лайық еді.

✓ Үкілі Үбірайды сипаттағанда Сәкен Сейфуллин:

"Кең алқым, кең көмейлі, даусы керней,  
Ақырмай ән салмайды, кекірек кермей.  
Астына алты қырдың естіледі,  
Шырқаса екіленіп құлаш сермей", –

десе, бұл Үбекенің жетпіске тақап қалған шағы, әлгі Мұсадай кезінде кездессе не дер еді.

Біржан сал жас Үбірайды алғашқы рет тыңдағанда Ақан серіге қарағ: "Ақанжан-ай, ертіп келген шәкіртіңе қанықтый, қазақта жылқының перісі Құлагер болса, ақынның перісі осы екен. Қазақ әніне өзім жеке-дара тұрмын, өзгелерге Үбірай жеткізбес" – деген сөзін Молақмет Тырбаевтен естіп едім, кейін осыған үқсас сөзді Е. Үсмайловтан да кездестірдім. Бұл ағамыз: "Үбірай – шын мәніндегі ұлы өнерпаз", – деп жазып кетті.

Сол дарабоз дүлдүлдің кеңес үкіметі келіп, әсіресе қәмпеске мен колективтендіру науқандары ел тұрмысын күйзелткенде Үбірай ақын өткір тілін шындық жолында аямады. Ақыры 1930 жылғы қарашаның 4-жүлдызында қамауга алынды. Асыл жерлестерінің тілі де батқан шығар, сол кездегі ақынды көрсеткен, НКВД-ге қол шоқ-

пар болған өзінің жақын тұтыстары Шаймұқан-ды да, Ақылпты да бала кезімде көрдім.

Үкілі Үбырай "Халық жауы" атанаш үсталып кеткеннен соң үй мұлкі талан-таражға салынды, шығармалары шырылдаған отқа түсті, атын атат-қызыбас, әндерін айтқызыбас әлем-тапырық аласапыран заман туды. Бірақ алмас кездік қап түбінде жатпады, туган елі өз жүрегінде сактады. Ол атылып кетсе де мінезі үлгі, қайсарлығы аңыз, әнжыры үмыттылмады. Кейбір әндерін халық әні деп, кейбір әндерін әлде кімдікі деп сақтаса да Тәуелсіз Қазақстан дүлдүл ұлына құшагын кеңдеу ашты. Бұл күндері Үбекенің әндері өзіне қайтарылып келді. "Гәккүге" тиіскендердің де бетін қайтардық, ал "Аңшының әніне" әлі күнге "Халық әні" деген лақап тараған жүрсе – ол қателік. Әйгілі клас-сик жазушымыз, академик Сәбит Мұқанов "Қазақ әдебиеті" газетінде бұл мәселенің басын ашып, ашық айтқан. Осы жинақта ақынның өлеңдері мен толғау айтыстары орын алса, келесі жолы әндеріне деген де ақиқатты орнату қажет.

Үкілі Үбырайдың композиторлық, әншілік мол мұрасы жайлыштырылған еңбектер баршылық, мен ақындық, ерекшеліктерін сөз етпекке бой үрдым. Қазақстанның халық ақыны, Үкілі Үбырайдың төл шәкірті Молдахмет Тырбиұлының айтуынша ол алдына жан салмаған әншілігімен қатар, қай сайысқа салсаң да дес бермейтін ағынды айтыс ақыны. Оган қоса қаламгерлігі де мол, араб, парсы тілінде оқи білген көрінеді. Үбекен ҳат танығаннан кейін қолына түскен кітапты оқығыш болыпты. "Мұңдық-Зарлық", "Қыз Жібек", "Жүсіп пен Зылиха", "Тотының тарауы", "Сейфіл-Мәлік", "Мың бір түн" іспеттес лира-эпостық, батырлық һәм гашықтық жырлармен қисса, дастандарды жақсы білген. Әсіресе "Ер Тарғын" мен "Мың бір түнді" өз ыргақ, нақышымен әнге қосып жатқа айтуға шеберлігін танытыпты. Кейде қара сырнаймен, кейде үкілі домбырасымен қоса шырқап, поэзияның желісіне

қарай ән мақамының өрісін жатық үйлестіре білгені үлкен өнер. Ұзақ поэманды әндегенде, кейде қолындағы домбырасын жерге қоя салып, тақпактатып кетіп, отырған жерінен ілгері, кейін жылжып қызығылықты қымылдармен жалықтырмас әртістерше тыңдаган жанды жіпсіз байландағандай баурапты.

Бойға қонған жан-жақты өнердің арқасында ауыз әдебиетінен әбден сусындал, жазба әдебиетіне иек артып, өз ақындық өрісін кеңіте білгені біз үшін алыстан-ақ, көрініп тұр.

Үкілі Үбірай өзіне үлгі болған Арыстан, Орынбай, Шал ақын, Серіз сері, Тезекбай, Шөже, Нұркей, Біржан сал, Ақан сері, Мұстафа сияқты саңлақтардың әндерін, айттыстарын ел арасына таратада білгендігі бір төбе. Қолына домбыра алғанда мынау Орынбайдың, мынау Біржанның, мынау Ақанның домбырасын қолына алғандарғы өз ыргағы, өз құлақ күйі деп, әуезімен, әуенімен, әр кімнің өзі сүйген сарынымен орындауга жетіктігін шебер айғақтағы. Молдекенің өзі де үстазынан көргенін елге таратып кеткені көпке айғақ,

Үбекең тек қана ауыз әдебиетінің өкілі емес, ол өзінің ең жақын һем жанашыр пір тұтқан үстазы Ақан сері секілді суырып салма төкпе де, ойланып жазар жазба да ақын. Негізінде олар ауыз әдебиеті мен жазба ақындарының оргасындағы табиги алтын көшірлер іспеттес жол салды. Үбекеңнің ақындық ерекшелігіндегі басты көрініс сол жанжақтылықта жатыр. Керегінде ағыл-тегіл құйғытып, қай сайысқа болсын іркілмей кірісе кетеді. Күрделі ән, не өлең туарда ішіндеңі нәрестесін тоғыз ай, тоғыз күн көтеретін анадай ұзақ уақыт толғатып акқудың қос қанатына байлардай етіп жетілдіреді. Ақындық ерекшеліктің қайнар көзі нәзік сезімге оранған ақыл мен ойдан туса, сол көкейкесті түйткісін Абай айтқандай: "Тіл үстартып, өнер шашардай" дәрежеге жеткізеді. Ақындық дерті — тілде. Үбірайдың тілі де жебедей жеткіш өткір тіл. Жас

кезінде әрлі сөз, үлгая келе мәнді сөз, ашынғанда зәрлі сөз таба білген Үкілі Үбірайдың тілінде ақындық, ерекшелігінің басты арқауы жатыр. Ақынның тіл байлығы шерлі сөзімен зерлі сөзін қоса жекеше талдауды талап ететін үлкен қазына. Ол ержүрек, ташқыр да айтқыр, тіксілтегіш қайсар ақын.

Үкілі Үбірайдың тіл өрнегіне аздал қана на-зар аударсақ, оның мейірімі мен қайырымы тар-тып, өзгеден айырымы ашық көрініске жолыға-мыз. "Гәккү" деген сөздің өзі де қазақтың поэзи-ясы мен бүкіл тіл әлеміне алтын айдардай болып кірген ғажайып. "Ұлпікер сүт бетінде бал-дай қаймақ" – десе "ұлпікері" үздік тілдің белгісі гой. "Қарақат көзді, сым саусақ" – теңеуге жүй-ріктігі. "Көк зенгір, жасыл жартас Жалғызта-уым" – дегені қандай өсем. "Қайқақтамай көте-рер, досы үшін тау-тасын" – дегені де нагыз қазақы тіл. Ал: "Бір атым насыбайдан көңіл қалар, айта бер, айтсаң сагың сынбаганға". – дегені тереңдіктің көрінісі. Майталман ақынның қай өлеңін алсақ та, ұлттық суреткерлікті білдіретін бояуы ашық, ояу сөзді, ішкі маңызы мен айттар ойға дәлме-дәл келтіріп, тап басқыштығына қай-ран қаламыз. Тіл мен жакқа құр сүйену емес, өткір тілі өсем әндеріне де дәйек болыш ескек желдің табиғи сыбырындағы поэзия әлемін ке-нейте тұсуге сенімді семсер міндетін атқарды.

Үбірайдың ақындық талантынан әншілік да-рынын да бөле жаруга болмайды. Ол алдындағы көсемдері Біржан сал, Ақан серіге еліктеп алга-шқы өлеңдерін де әнімен қоса шалқытты. Ұыз ту-ындылары гашықтық сарында, әзіл құлкі ауқы-мында дәстүрлі лириканы байытқаны анық, Қа-зактың ежелгі салты бозбалалықтың қызығын күйттеу Үбірайға да бастау берді. Шебектің Мұқанының Мәлике атты сұлу қызын бір жи-ында Ақан серінің ойынды басқару салты мен нұсқауы бойынша алқа топта бірінші болып қасы-на өлеңмен шақырыпты.

"Бозбалаға бұл бір сын жеке-жеке,  
Әркімнің қасындағы сәулесі ерке.  
Бүйрығы ханзаданың екеу емес,  
Жанымда келіп отыр, ей, Мәлике", –

деген өлеңі сонда туыпты. "Ханзада" деп отырғаны Ақан-агаң гой. Ақан серіні агайын ел іші әуелі "ақ жігіт" деп атап, артынан "Ақан-ага" деуге көшіпті. Ал, бұл Мәликеге байланысты шумактың жарық көруіне ол кезде жігіт агасы болып қалған Ақан серінің жастардың ойынын бастап беріп, бірінші кезекті сенімді шәкірті Үбірайга сілгеуінде жатыр. Жас Үбірай "Көсем қында, шешен жиында" дегендей көш бастап, өзі міндеттін атқарыпты. Ол нағыз ішкі сенім мен қанына тua біткен жүректіліктің белгісі. Міне, сол сәтте шыдай алмай буыны бусап, күміс шолпысын әсем үнмен сылдырлата, сзыла басып, сиқырлы сылқым Мәлике сұлу ашық ажарын жайната түсіп, жас ақын Үбірайдың қасына отыра кетіпті. Сол ғажайыш жастық шақ, деген асыл дәурен әрі қарай жетелей береді. Күндер жылжып озған сайын өлеңі де маңызданып, жанга жайлы, көнілге жылы тиер дәрежеге жете бастайды.

"Ән салып Сері болып талағтандым,  
Ақылын тыңдау қайда барлық жанның.  
Бөркіме үкі тағып, сәндең киіп,  
Жолына түспей кеттім дүние маддың", –

деп өзінің ана сүтімен ере келген ақындық, әншілік өнеріне белді бекем буганын үғымға жеңіл, жинақы тілмен осылайша киыстырыпты. Әкесі Сандағайға тартып ұста болмады, немере агасы Әбілге еліктеп саясатқа кіріспесе де, ақындықтың сүршаша құсы жебеп өнер жолына сиқыр күшпен еліктетті.

Өмір өрісіндегі жаңа белесіндегі ақынның "Жиырма бес" атты өлеңі жарқа етті. Міне, ақындық жолында ауызға лектірген бастамасы осы еді.

“Қызды ауылдың сыртынан,  
Қылаң еткен жиырма бес.  
Қызды көрсем қайқайып,  
Құлай кеткен жиырма бес.  
Суга келген жеңгейге,  
Ұнай қалған жиырма бес  
Жеңге халің қалай дең,  
Сұрай қалған жиырма бес  
Бесіктегі баладан  
Алғыс алған жиырма бес,  
Төрде жатқан кемпірден  
Қарғыс алған жиырма бес...” —

Деп төгілте жөнелсе, ақындық қуаты да жасына қарай жаңарып, жауқазын гүлдей құлпыра түсіп, көз тарта бастағанын айқындаиды. Бұл кезде суреттеу тәсілі, бейнелеу әдісі келесі бір биік белеске көтеріле бастады. Тап осындай ыргакцен келетін “Жиырма бестер” Ыбырайдан бұрын да болды, “Құлдір, құлдір кісінетіп, күренді” мінгізді. Ыбырайдың “Жиырма бесінде” өз көзіңмен көріп тұргандай өмір көріністері айнадай айқын, тартымды беріледі. Әні де ә дегендеге алдына мал салмас жүйріктей ұшқыр, қызғын шабысқа бастап кетеді. А.С.Пушкиннің “Ескерткіш өзіме орнattым келмес қолдан” деген өлеңіне шейін бірнеше “Ескерткіштер” болған. Бірақ Пушкиннен кейін бола қойған жоқ. Ыбырайдың “Жиырма бесі” де заманындағы аттас өлеңдердің ең сүйкімдісі болып кең тарап кетті. Бұл күнде байтақ елдің қай түпкіріне барсақ та Ыбекеңнің “Жиырма бесі” алдымыздан шығады. Әсіресе Қайрат Байбосыновтың орындауында есту бір ганибет.

“Ауылым қонған Сырымбет саласына, болым ғашық ақ сұңқар баласына” — деп Ақан серінің “Сырымбет” әнінің сөзі Үбырайға екі жақты үлгі таstadtы. Өз әдрісін анық айттып, жаны құштар ғашығына деген ішкі сезімін ашық жеткізді. Ұстазы секілді Үбырайдың да ынтық сөздері әнінің

асқақ қарқынынан кем соқпайды. Ол алдындағы даңалардың ел сүйсінген ұлгісінен алған дәрісін жасырган да жок,

"Өлеңмен екі өкпенді қалқытайды,  
Қорғасындаған дененді балқытайды.  
Біржаннан алып қалған әнім еді,  
Азырақ, "Шалқымамды шалқытайдын", —

деуі әлгі ойға дең қояды. "Шалқыма" Ыбырайды толқыға түсті, өлеңіне орнықты ыргак, жүйелі тың сарын ұсынды. Оның ақындық болмысы өз арнасын тапқан өзендей, өз шалқар теңізіне қарай аспай-саспай аға бастады.

Бара-бара бұл өзен тасқынды сайлары мен қарқынды құламасын таптты. Ол көңілі ауган, шабытты желген жерде еркін сілтеп, алты қырдың астына жетердей шырқауға дағыланды, ерен ақындыққа ере туған қанатты әндер елді жалт қаратты. "Үкілі Ыбырай" атанды. Дарқан ақындығы қай думанға кірсе де ел құлағын елеңдettі, жан құшырын қандырды, әрдайым өрелі дәрежеге жетеле, өрге шапса өршеленер жүйріктей заулатты. Тамаша галым, белгілі әдебиеттанушы Есмагамбет Смайылов 1966 жылғы "Жұлдыз" журналының №11 санында осы ойды шегелеп бекіткендей айттыпты. "Халық тарайтын емес, ағылыш келіп жатыр. Ыбырай іркілген жок, бұл жолы термелері жәрменекеге келген халықты қошаметтеп, әр ұлдың руын, тарихын тарағып бірталай жырларды үйілтіп, төгілтіп айттып тастады... Арасында күлдіретін әзіл-сықақ сөздер де, бұрыңғы-соңғы ақындардан нұсқалы, нақыл сөздер де аузынан шықты" — дей келе: "Бұл менің онбес жасымда Ыбырайды тұңғыш көруім... Бәрінен де Ыбырайдың дарқан ақындық, әншілік өнері, алғыр шешендігі есімнен кетпейді", — деп тебіреніпті. Міне, әдебиет білгірі де "дарқан ақындық", "алғыр шешендік" — деп баса айттып отыр. Хан базарлы жәрменекеде еркін төгілу де әркімнің

Қолынан келе бермейтін агедендік. Ал “әр үлдың ... тарихын” тәмамдауы Ыбекенің тайга таңба басқандай айта білер мәттақам қабілетін, толайым зеректігін танытады.

“Гәкку” жайлы талай сырды шертер едім, бірақ өнін де, тамаша сезін де байтақ ел түгел біледіғой, сол асқар шыңына қолтықтас тұрган тұмаларын көрсетейін деп, “Гәккуге” көп тоқталмадым. “Құс салып айдын көлде дабыл қақтым”— деген сезі де қанатты сөз болып кетіп, кейінгі талай тарланға үлгілік көрсетті. Үкілі Ыбырайдай ақының, ақынның қазақ поэзиясындағы асыл орнын сөз етіп отыргандағы “Гәккуден” кемшін түспестей, “Қарақат көзді сым саусак” атты өлеңіне молырақ зер салғым келді. Шынайы сезім мен шалқар шабыт түйіскенде, шықтай мөлдір шындық сырын шашпай-төкпей ашық, айтудың үлгісіндегі тамаша туындысы осы. Бұл өлеңі Абайдың ғашықтық тақырыбына жазылған әйгілі толғаныстарын амалсыз ойға оралтады, дана жүректердің махаббатшыл нәзік лұпілдері де алыстан ұласып жатқандай сезім білдіреді.

“Қарақат көзді, сым саусак,  
Ләбізің сенің бал қаймақ,  
Жолыңа сенің сарп етпей,  
Неге де керек малды айдан.  
Қарақат көзді, ақ білек,  
Айтайын бір сөз үлгілеп,  
Қайғың алды денемді,  
Жүректің басын тілгілеп.  
Етің аппақ қояндай,  
Қызығыңа тоям ба-ай,  
Алыстан аңсан келгенде  
Не қыл деп жатсың оянбай”, —

Деп наздана тебіренгені ақынның жан қияр ғашыққа деген үздігіп тұрган құмарлығы, ынтықтығы һәм өзінің де осал еместігі қатар көрініп түр. Сәкен агамыз “Тау ішінде” атты өлеңінде

“Білгейсің келгенімді жалғыз өзің” — десе, өзім де “Аққу жеткен” айты өлеңімде: “Ей, қалқа таң мезгілде сырласайық, толқынға тербетіліп жатшы оянбай” деп сзыла қалыптын. Ал, Үбекен: “Алыстан аңсан келгенде не қыл деп жатсың оянбай” деп, өзінің аңсанан жүрегінің ыстық лебі мен гашықтық ерке назын қосақтайды ашықтан ашық, тосады. Сырт қараганда қатаңдау, қысандау, сәл бәлсінгендей көрінгенмен “Не қыл деп жатсың оянбай” деудің өзінде де бал ләззаттың үзім шырынын тезірек татуга құлшынғандық жаттыр. Қимастық, сыйластық, күрт сагынышқа оранған шыдамсыздық шырылдап тұр. Ақындық, ақжарма мінездің бұл да бір айқын айгагы. Үкілі Үбырайды жақсы билетін классик жазушымыз Сәбит Мұқанов: “Қарақат көзді” деген өлең 50-60 ауыздай бар. Бәрін де “Қарақат көзді” — деп бастайды. Бұл өлең осы күнгі махаббатшылардың өлеңдерін маңайына отыргызбайды” — деп жазған екен. Одан артық не айтпақтыз.

Не десек те поэзияның бұл кесек үлгісінде Үкілі Үбырайдың ақындық ерекшелігін тауда өскен өсем шынардай, алыстан айқын танытқандай тамашалық бар. Айқын сөзін өз әнімен шырқасақ қазақтың керемет әні, ал роман сазына салсақ өз көркемдігін, сезімталдығын, толқымалығын аша түсетіні сөзсіз. Жалғыз өлең үзак поэмадан кем емес, шагын роман, даланың романсы секілді. Бір өлеңді тамаша поэма дәрежесіне жеткізе білу де үлкен шеберлік. Мұхтар Әуезовтың “аз көлеммен көп магына беретін шеберлігін” академик Зейнолла Қабдоллов айтқандай, Үбырайдың да айқын тілімен аз сөйлеп, көп ой қозгай білгіштігі көп өлеңдерінде соқырга таяқ ұстаратқандай көрініп тұр. Шеберлік деген үгымның шырқау шебі де осы шыгар.

Композиторлығын баса айтып дағыланған-дықтан Үбекеңнің ақындық мұрасына зерттеушілер көп мән бермей келді. Ол кемшілікті түзету қажет. Әрі айқын, әрі композитор, әрі үздік

орындаушылық, бір өзіне қонғандықтан логика жүйесіне салсақ; өлең сөзі бірінші, содан кейін ән, ең соңында орындау тұрады. "Бес ғасыр жырлайды" (Алматы. 1984. "Жазушы") атты белгілі жинаққа Үкілі Ыбырайдың кірмеуі мені қатты қынжылтты. "Ала қойды бөле қырыққан жүнгө жарымайды" деген сөз көкейімнен кетпей қойды. Біржан сал, Ақан сері, Үкілі Ыбырайды бөле жаруга болмайды. Бәрі де ең өуелі ана сүтімен ере келген ақындыққа бөлөнді, содан кейін әнге құндақтады, одан әрі орындаи берудің құдіретті қүші бітті. Үкілі Ыбырайды да қазақтың үлкен ақыны дег танып, қатардан қалдырмаган ләзім.

Ыбекең қай тақырыпқа барса да көкірегінің көзі жеткен, ақындық сөзі жеткен шырқау шыңға шықпай тынбайды. Құштарлық, пен құлшыныстың мөлдір ләzzатқа өле құмар қарқыны қазақ, ақындарының ішінде "Сүй, жан сәулем, тагы тагы да сүй, тагы да" немесе "Бұл ләzzәттің бір минутын бермеймін, патша тагы бүкіл дүние малына" – дег тұрган Мажжанда айқын кездеседі. "Қарақат көзді сым саусақтың" бір шумагында:

"Мұхиттың сенсің құндызы,  
Аспанның сенсің жұлдызы,  
Өзіңнен сәулем аспайды,  
Пейіште жүрген хор қызы", –

дегенін естігенде, өзі барып пейіште жүрген қызды көріп келгендей сенесің. Сүйгөн қызын жер-көктө, фани-бакида бар сулуулардан асырып жіберуі бұл галамда бар шыргалаңға өуестіктің нағыз өзі, қазақ поэзиясының тәңір берген асыл төрінен орын алар кемел деңгейін айқындағаны. Ыбекеңнің өлеңдерінде тың суреткерлік, тұлғалы да үлкен ойшылдық, гашыққа деген ақжарма ашықтықтың нәрі бар галаматтың бәрі бар. "Қарақат көзді, сым саусагы" сол ерекшелігін айқын танытады.

Жорықта сес көрсеткен батырлардай асқақ-тап, ақындардың өздерін-өздері көтермелебулар

дағдылы үрдіс. Ыбекен де бұл бәйгеден озық келген намыскер. Тілге тиек болар "Қайран Гәккү" деген өлеңінде:

"Қыздан да қылықтымын жүрген жерде,  
Ханнан да қадірлімін туган елге.  
Ақ тамак, шұбар бауыр қоңыр қаздай,  
Сала алмас "Гәккуіме" еш бір неңде", –

деп, мәреке жетерде алдына жан салмас Құла-  
герше еркін қарқындаиды. "Ханнан да қадірлі"  
болса да, ел алдында қыздай тәлімді қылығын  
көрсетеді. Дарияның ішкі ағыстары мен сыртқы  
толқындары табиги араласып жатқандай ақын-  
ның ішіндегі қызу құйылымдар ерік бермей  
жүлқынып сыртқа шығады, асау толқындарга  
айналып бірде бүрқанып, бірде сылқым гана сыл-  
дырлаи "құлақтан кіріп, бойды алады". Адамның  
жан дүниесі мен тән сезімін ашық, көрсетуде  
Ыбырайдың өзіндік ерекшелігі бар ерен ақын.

Үкіл Ыбырай Абылай ханның батыры атан-  
ған Сәбден дауылназдан тараң, немере ағасы  
Әбіле Шыңғыс Ұәліұлының хатшысы болып, өзі  
атақты ақын, әнші ретінде дүниенің қызығын  
көріп, көрешектің есесін қайтарғандай ән-жы-  
рын іркілмей төгілтіп өтсе де, оның тағдырының  
тәбдел бермес қындығы да зор болды. Әсіресе  
жасы ұлгайған кезде жазған өлеңдерінде сол  
баяғы ерке екпінмен өмір шындығын бояусыз  
бүркемесіз шертеді. "Сүм дүние суманған сен  
бір қақбас, үйінде сені құган үш күн жатпас" –  
деп тегіннен тегін айтпаған гой. Біреулер үйінде  
үш күн жатпай, қара бастың қамын ойласп шыл-  
қыш жүр, біреулер бұрынғыдан жүдей түсті, әне,  
сондайды байқагыштығы тебіреністің ашық түрі  
болып ет-жүрегін жарып шығады. Ақынның  
әлеуметтік сарындағы өлеңдері толагай толғау-  
лар іспеттес аз сөзбен шексіз үгым береді.

Үкіл Ыбырайдың көңілге бір естігенде не бір  
окығанда жеп-жеңіл қона кетер қанатты сөзге

айналған иірімдері де жетерлік. Академик Аманжол Қошановтың әкесі, Шал ақынның шөбересі Қошан Жантілеуұлы ақсақалдың Үбірайдан қалған сөз деп, айтып жүретін шумаққа зер салайық;

“Қосылған жолдан шүйкебас,  
Жан қияр жерде жар болмас.  
Айыр өркеш нар болмас,  
Әкенің сөзі балаға  
Канша айтсақ та ар болмас”, —

Депті. Бұл фәлсәфалы толғаныс қай заманда болсын өз құндылығын жоймайтын ойлы көкіректен туган жан сыры. Үбекеңнің ақыл-ойга толы терең психологиялық толғаныста туган өлеңдері де баршылық:

“Шаш алмас өтпес пышақ қайрағанга,  
Томар су суат бермес жайлаганға.  
Талықсып қорғасындаи денең балқыры,  
Таңертең қара торғай сайраганды”, —

Деп теңізде жүзіп бара жатқан нән кемедей асық-шай, саспай кемеліне келе тебіренер жерлері сүй-сіндірмей қоймайды. Бұл шумақты “Қараторғай” атты өлеңінен алып отырмын. Сол өлеңде: “Қиянат қылмау керек тимегенге, жанасып неге керек сүймегенге” — деуі де философиялық қарымды, психологиялық танымды меңзейді. Есіл, Қекше өңіріндегі үлкендер бала кезімізде бұл сөздерді тілдеріне тиек ететін. Тоталитарлық қыңыр, біргога идеология ақын сөзін қанша қараласа да құлыптаі алмағы. Ақынның талай сөздері есті адамға күш беріп, ел аралап жүре берді.

“Қалдырган” атты өлеңі туган елге деген аманат атанған соңғы сөзіндей ел ішінде түгелдей жаттады. Осы күнде қазақ елінің қай түшкіріне барсаң да алдынан шығады. Бұл өлең алғы буын ағалар мен соңғы түлек інілерді жалғастырып тұрған, өмірдің мархабаты мен мекнатаң жасыр-

май көрсетіп, жасы ұлғайғанда тәубага келгендей ғақыл сөзі іспеттес татымдылығымен ел жүрегінен қоныс тепті. Одан кейін:

“Қызығың дүние өткен күн,  
Кейінгі күшін жеткен күн.  
Байланбаған асаудай  
Сырт айналып тепкен күн”, —

деп өмірінің шуагы өтіп, шөләйтті келеңсіз кезеңдері тебірендіре бастағанын үлкен күрсініспен айта білуі нағыз шеберлік. Өйткені “Сырт айналып тепкен заманның зардабына қазақ, халқының көніп отырганына жаны ашиды, қындыққа арқа жонын тосып, жауапкершілікті өз мойнына алып отыр. Бұл үлкен астарлы өлеңде түгел айтып сілкілемей, ымдал қана сілтеу бар. Бұл да үлкен ойлы ақынның азаматтығын айғақтайды.

“Жолдас болсаң жақсымен,  
Терең ойлы, ақылы кең,  
Кішіпейіл сыр шашас,  
Мінез, білім келсе тең”, —

деп, өмірдегі үзеңгілес, сырлас, сыйлас болар жолдастың қандай болуын жырласа, мінезге білім сайлығы қажеттілігін өдемі келтірген. Бұл мың түрлі сарында ерте де, кеш те айтыла беретін тақырыптың ол кездегі поэзиямызға қосылған ойлы үлесі деп түсінерлік туынды.

“Қыс келсе қадыры кетер өткен жаздың,  
Әр ісі паш келеді өнерпаздың.  
Шөл жайлап, томар қонған күні құрсын,  
Болмаса көл саясы қоңыр қаздың”, —

деуінде адам жанын толғандыратын, жақсыны қимастық, жаманга көніл толмастық наз жатыр. Бұл өлең Ақан серінің:

“Өмірдің көбі өтіп, азы қалды,  
Қос көлдің қуы кетіп, қазы қалды.  
Ей, қалқа бұл ауылдан сен кеткен соң  
Ертайдай келіп жүрер тазы қалды”, —

дегенідей елестейді, бірақ өз заманының дертін айтқандай, өз ерекшелігі, өз байқампаздығы бар, өз дертін Үбырай басқаша жеткізеді. Ақындық толғаныстың ішкі монолог жүйесінде төгіліп түсken мәп-мәлдір түріне қосылады. Міне, осындаиді адами толғаныстар ақынның поэзия деп атлатын көркемдік өресін, психологиялық парасатын, ашық ақындық үздік шеберлігін көрсетеді.

Қошан ақсақал Үбырай ұсталғанда артынан тоқтты сойып, қымыз апарған екен. Сонда Үбекен:

“Атығай мен Қарауыл,  
Бірің – тіл, бірің – көмейсін.  
Жакындығың осындаid,  
Қайсысың маган өгейсін.  
Ашыққанда ас беріш,  
Әлсіздерді демейсін.  
Нәсіліңе тартып сендер де,  
Елдің қамын жегейсің”, —

деп әндете толғаныпты.

Бұл сонда Үкілі Үбырайдың 72 жасқа келген кезі. Ел асылы, ел ағасы жалғыз Атығай мен Қарауыл емес, бүкіл қазаққа аты әйгілі ақынның айтып отырган ел бірлігін көксеткен ғұлама гибраты да осы. “Әлсіздерді демейсің” — дегенде өзін айтып отырган жоқ, ел ішіндегі аштыққа үшыраган кем-кетікті айтып отыр, “Нәсіліңе тартып” — деуі ұлтыңа тартып дегені емес пе. “Елдің қамын жегейсің” — дегені әмсек үрпаққа бірдей қажет ел ұраны біздің бүгін көрген тәуелсіздік заманымызға да ауадай қажет болып отырган жоқ па. Елбасымыз Н.Ә. Назарбаевтың бүгінгі таңдағы барша елге айтып жүрген ақ тілегі гой.

Елдің қамын ойлаған азамат ақын Үбірайдың бұл сөздері оның шығармашылық өнерінің шырқау шыны, ақындығының "Гәккуі".

"Қаумалаң халқым келгендеге,  
Қияға қанағ қомдадым.  
Би-болысты мысқылдаң,  
Қыр соңынан қалмадым", —

деп ақ, патшаның кезінде қағытқаны жалын жүгүп, шоқ шайнаған ызалы да, кекті де кезі. Ал шал тартқан шақта:

"Сақал мұрттың ағында,  
Өлерімнің шагында,  
ГПУ — деген мекеме,  
Ішінде үстап қамбаның  
Әлде қайды қамадың?  
Қысқарып өріс түрганда,  
Биікке қалай өрлейін.  
Асылды білмес наданды  
Айтып қалай емдейін", —

деп торықса, абақтыда отырып елден келген адамдарға шынын, сырын, көкірегін кернеген мұңын айтқаны бір жағынан кеңестік дәуірдің зорлығы мен қорлығын әшкерелеген азаматтық жан дауысы болып естіледі. Көз жұмардың алдында тап осылай айта білу де Махамбеттік мінездің үшқынындай әсер қалдырады.

Үбекенің ақындығын сөз еткенде: "Сүйгенім кете барды соңыма еріп", "Қалдырган", "Көкейкесті", "Көкшетау" секілді тұған елге ынтық мархабатты, шапағатты өлеңдерін ұмытпаймыз. Олардың бәрін және айтыстары мен термелерін толық, қосып, толағай зергтеу шағын мақалага ауыр болар деп қана, қадау-қадау жерлеріне тоқтадым. Эйтпесе Дәнеш Ракышев сынды әйгілі әнші айтып өткен "Аңшының әні" деген өлеңнің "дө сөзі ғаламат қой. Ол өлеңді Сәбит Мұқанов ага-

мыз рабфакта Орынборда оқып жүргенінде жазып алыпты, шыгармаларында толығымен бар. Мениң өзімнің бала кездегі блокнотымда да Молдахмет Тырбиұлынан жазып алғаным сақталышты. Әйтеуір бірінен түсіп қалған жерлері бірінен табылардай жөні бар. Орнында бар оңалар деген даналықтың дәл келгені де осы шыгар.

“Бірге өскен кішкентайдан асыл еркем,  
Көңілімді қалай менің қалдырасың.  
Құр айтқан асыл сөзің алдағаның,  
Сандықтың аштырмасаң абдырасын.  
Ай жарық, терезенің дәл түбінде,  
Төсекте қара шашың салбырасын”, —

деп ағындараттын “Қалқа баласын” ақын жүректен қалай гана үзіп тастарсың. Үкілі Ыбырайдың ақындығы дегендеге айттар сөз аз емес, қайсы бірін тізбектеп тауысармын. Бірақ, азаматтық, өжеттігін көрсететін бір өлеңін һәм ақыргы өлеңін ертең Көкшетаудан Қызылжарға әкетерде абақтының қабыргасына жазып кетіпті. Абақтыдан шыгарғанда милицияның айдауылдары көріп қалып, ішіндегі бір жуастау қазақ баласына сүртіп таста деп кете барыпты. Эне, сол жігіт өлеңнің біразын өнері жеткеніше жаттац, кей жерін асығыс жазып алып бір туысына жасырын айтып беріпті. Қайырымсыз ГПУ-ге, Кеңес үкіметіне деген ашық, келемеж бен улы сықақты бүл өлеңді бұрын естіле бермегендіктен қолымда барын толық, келтірейін:

“ГПУ” — деген сотымыз,  
Жүріп түр гой хотыңыз.  
Жетпісте шалды айдаттың,  
Кесілді гой кө...міз.  
Атаңа нәлет Николай,  
Қырсығың тиді-ау бір талай.  
Білместі талай білгіздің,  
Мақпалдан шалбар кигіздің,

Жібектен дамбал кигіздің.  
Жүйрік пен жорға мінгіздің.  
Ханнан да асты қадірім,  
Алғыс пен құрмет үйгіздің.  
Айналайын советім,  
Теріден шалбар кигіздің,  
Кенептеген дамбал кигіздің.  
Жел жаққа тура қаратып,  
Тік тұрғызып сигіздің.  
ГПУ-ді салып соңыма  
Жамандыққа қиғыздың.  
Алыстан келген жауым жок,  
Ауылдың итін үргіздің.

Міне, ақынның жанған оттан, төнген оқтап тайынбас дауылпаз мінезін көрсететін тоталитарлық қысымда кек кернеген толғауын нағыз ғасыр үні деуге әбден болады. Ақын "Көкейкесті" – деген өлеңінде терең оймен толғана түсіп: "Әулиесі бақсының қараса да, жүрегімді жазуға табылмас ем" – десе, жүрегін жазуға жааралық ем – елдің жүдеу халінің түзелуі еді рой. Ол жылдарды қайтып көзі көрместей, құлағы естіместей қамыққаны да сол да. Келе жатқан аштық, пен жұттың алдынан шығып, тойтарыс бермекке ұлыққа қарсы сөз айтгамын деп, Кеңес үкіметінің қиянатшыл каһарына жазықсыз таң болды. Адуынды арқалы ақын дүниеден қамығып өтті. Біреулер "Барса келмеске", біреулер "Көк арапға" айдалды дейді, енді бір дерек Қыыр Шығысқа сілтейді. Менің үғымымша соның бәрі бекер һәм шығарыш салма сөз, алдамшы сөз секілді көрінеді. Үкілі Ұбырай атылды деп есептеймін. Сәкенді де "анда көрдік", "мында көрдік" дегендерінің бәрі де далбаса болып, далада қалған жоқ па. Сәкен де ГПУ-дің "ұштіктігінің" шешімі қабылданған күні атылып, Алматының түбіндегі бір ескі ауылдың тонырагында көппен бірге көмілді. Ұбырайды да сол қатыгез тағдыр жұтты рой деп ойлаймын. Осындағы мүң үялаған уақытта:

"Ардақтап атамаймын атын бекер,  
Жетпісте жолбарыстай батыл екен.  
Атылған ел, қырылған аштықты айтып,  
Үкілі Үбырай қайда жатыр екен?" –

деген сияқты шумақтар жүректен тамшы жастай үзіліп түсे қалды.

Ақынның поэзиялық ерекшеліктері туған жері, өмір сүрген қоғамдағы ортасы, соган байланысты әлеуметтік һәм саяси құбылыстарды өз жүргегінен өткізіп, өзінше тебіреніп көніл күйін, жүрек сезімін, ақыл-ой толғаныстарын ақ қағазға түсіре білуінде жатыр. Ерекшелік деген әркімнің өз болмысы, өз мінез-құлқының айнадағы бейнесіндегі көрініс қой. Өмірде қаншама адам бар, соншама мінез-құлқы бар, стиль – деп алатын айқындауыш түрі бар. Сол стильде ақынның да ерекшеліктері әр теңіздің өз тасқынындей толқын ұрып жағалауга жетіп жатады.

Үкілі Үбырай да тап солай өзге еш ақынға да үқсамайтын өзіндік мінез-құлқымен, өзіндік ашықтығы, айқындығы, турашылдығы, шапшаңдығы мен салмақтылығы бар ақындық дара құбылыс. Үбырай кейбір халық ақындарынша бір сарында, бір гана ырғакта, бір гана өлшемде қалған ақын емес. Оның шығармашылық, ақындық тәсіл, әдістері сан қылышынан келеді. Оған қоса ол қазақтың жазба әдебиетіне де, суырыпсалмалығы бар ауыз әдебиетіне де қатысы молынан бар қаламгер, сегіз қырлы бір сырлы парасатты дарын. Бір сөзбен айтсақ шындықты тұра сілтеуден жалтармайтын, қай заманда өмір сүрсе де өзінің өжет қалпында өршелене қала беретін бірбеткей ақын. Оның қай өлеңін, термесін, толғауын алсаңыз да жаңалық пен ақиқаттан, нәр алған өткір де шешен, терең де ерен жалтарусыз мінезіне қаныгасың. Дүниеге мейлінше гашық ақын, дүниені соншалық айқын, ашық жырлап өтті. Өз қара басының қамын күйттеген жоқ қоғамдық талас тартыстарға қатынасып, сол

елім деп еңіреп жүргөн жолында қатыгез заманның аяусыз ажал оғынан қаза тапты. Үкілі Үбірай сал-серліктің сайранында қалып қоймай, бойына Махамбеттің мінезі сіңген қайсар ақын, алғыр айтыскер, ұлкен сықақшы, ержүрек азамат ақын. Оған қоса айтарым: “Көкіректе қайнаган шер ондыра ма, көңілді бір орынга қондыра ма?” — деп өткен нағыз мұңды ақын.

Ұлы композитор, алдына жан салмай өткен дүлдүл әншінің ақындығы да сол гажайып талантына сایма-сай туган тұтас дүние. Ақын үшін ескерткіштің ең ұлкені — артында қалған еңбектерін толық жинастырып, ел қолына беру деп білемін. Міне, осы мақсатқа жету жолында Үкілі Үбірайды зергітеп, жинастырып жүргөн ақындар, әншілер, сазгерлер, жазушылар, галымдар бірігіп еңбек етсек, ел қуанар іс бітпек. Сол қасиетті ұмтылысқа қозғау салып, түрткі болардай ел құлагын елеңдетер деген үмітшіл сезіммен асыл бабамыздың ақындық ерекшеліктерін қысқаша сөз еттім. Айтар пікірім бұл мақаламен шектелмейді, келер күндер дарқан дарынның абзал есімін аялай түсер деп сенемін. Бар айтарым: Үкілі Үбірайды тек қана ұлы композитор, бұлбұл әнші деп қоймай, көркемдігі мен кемелдігі мол дүлдүл ақын деп қарауға шақырамын. Үкілі Үбірай жалаң ақын емес, ол ел қамын жең ақындық, сөзбен айқасқа түскен қайраткер ақын, жанжақты біртуар ақын, оны алдыңғы қатардагы ақындық санаттан қалдырмайық, қатал заманда қасірет шеккен, елі үшін құрбан болған Алаштың арыстарының қатарында азаматтық биіктен де көрсете білу адал парыз. Осы жинаққа кірген Үкілі Үбірайдың поэзиялық еңбектері ақынның қай дәрежедегі ақын екенін анық, көрсетер деп сенемін.

*Қазақстанның Республикасының еңбек сіңірген қайраткері – Кәкімбек Салықов  
Астана, 2005.*



---

# ӨЛЕНДЕР

---